

本朝分省人物考

人物考卷之二十五目錄

南直隸松江府一

全思誠

孫作

何廣

何潤

沈度

沈粲

陳楨

王公亮

王鍾

李至剛

俞允

夏衡

陳詢

葉宗行

李伯嶼

附于澄

清

夏寅

錢溥

張瑩

任勉

衛穎

唐瑜

侯蓋

朱奎

談倫

張悅

王霽

唐珣

陳章

張誥

曹時中

高祐

張黼

張弼

奚昊

周佩

戴體

孫衍

唐禎

顧清

錢福

陸深

本朝京省人物考卷之二十五

南直隸松江府

全思誠

全思誠字希賢上海人博雅宏粹少負文名洪武十六年以耆儒徵授文華殿大學士上曰朕觀古人有志之士雖髮白氣衰心猶不怠故能善其始終卿懷才抱德志肩古人朕甚嘉焉惜乎年迫衰暮志雖存而力不能任朕不忍復勞特授此職以輔導太子免卿早朝日宴而入不久當從其志庶不負卿平生所學而鄉里亦有光矣思誠固辭翌日放還

孫作

孫作字大雅自曾祖潑川傳至作而學益大門弟子以尚清先生稱之而不名著書十二篇號東家子詞旨閑博雜之子書中蓋不能辨也至正兵起挈家入吳盡棄他物惟載先代藏書兩敝篋張士誠聞而廩祿之卒以母病謝去用是益貧然熙怡自若略不爲動久之衆爲買田築室家於松焉洪武癸丑召纂修日曆授翰林編修官乞外授太平府教授三年選學官任除國子助教明年分教中都又明年還成均又明年陞國子司業後終於漢成里所著有滄螺集版

行於時

何廣

何廣上海人洪武中以明經被選知任丘縣卓有惠政邑稱循良陞江西僉事再陞湖廣叅議所至皆著能聲清廉寡欲纖滓不染在風憲有激揚名在藩垣得方岳體嘗著律解辨疑法比家宗之

何潤

何潤字子潤華亭人吳元年四月海氓錢鶴臯乘時未定率鄉氓無知者鼓譟入城擅開府庫竊器伏盜金帛殺良民執華亭知縣馮榮表浦場官李肅袁普

等將害之潤以身嬰其鋒願舉家坐卒脫榮等死知
府荀玉真逃之野還遇害潤亟奔其死所收其遺骸
函藏哭奠授其家人還葬焉府及屬司八印皆散失
不知所在潤物色得之出私財購而納諸官方倉卒
時老稚百不能出城避難者無問識不識悉爲寘縣
之後堂供其宿食得免者甚衆及葛指揮率兵來誅
兇悖潤復具羊豕酒醴迎犒於郊費皆自己出旣又
率父老詣龍井莊謁丞相徐公拜其殲渠岡治之德
一方以寧馮尹深德之將聞其事於上潤固辭乃
止時咸稱曰何義士楊維禎錢惟善諸公爲傳其事

而歌之

沈 度

沈度字民則華亭縣人度溫雅敦實自幼嗜學博涉經史洪武中郡邑交舉文學弗就坐累謫雲南跋涉萬里於時達官重帥爭欲迎致館禮之岷王具禮幣以聘旣至屢進直言都督瞿能能知賢下士延於家塾爲弟子師旦暮躬請益焉入京師以度偕行時

成祖初臨御命翰林舉賢才值禮部尚書楊溥爲編修以度名上擢翰林典籍時方制勅填委旣視草學士以下分書之上獨覽度書稱善凡玉冊金簡用

之 宗廟朝廷藏秘府施四裔一切大制作必命度
書之書婉麗道逸兼篆八分尤高古渾然漢意日侍
清密無間 賜二品金織衣製象笏鏤度名氏塗金
以賜以其弟與子皆善書悉官之近侍父子兄弟並
榮於 朝古今以書承寵遇莫或加於度者度爲文
章尚理致平澹雅則不爲浮靡事 上必盡誠被顧
問必以正對由典籍陞檢討復陞修撰永樂十四年
陞侍講學士 仁宗朝進協正庶尹 宣宗臨御進
翰林院學士踰七十再上章乞致仕不聽度事親孝
與子友愛相篤終身與人交久益敬爲人貞靜不苟

附初入翰林鄉人有爲大宗伯者氣勢赫奕朝士希
進者日奔走其門度以故舊獨自守未嘗輕造間或
邀度輒以禮辭士論高之間則閉戶焚香鳴琴賦詩
以自樂人號自樂先生襟宇澄澹風韻蕭散所好惟
載籍法書名畫古器自題其齋居曰樂琴書處雜蓄
花卉奇石每高人韻士至必具觴酌或吟或奕意度
翛然所作詩文有韻南藁隨筆錄西清餘暇自樂藁
藏於家年七十有八一日徵疾猶作和王行儉小洞
天詞明日捐館訃聞上遣禮部郎陳謨賜祭給驛
舟歸喪命有司營葬

沈 粲

沈粲字民望華亭人幼穎敏異常兒八歲通孝經語
孟十歲善真草十三父母俱亡兄謫遠戍獨閉戶讀
父書疑難輒走父執問辨之家貧無楮日懸腕書壁
筆力遂大進鄉人長老咸異之率遣子弟從游歲致
數十人時方垂髫坐上座毅然設教皆有成法 太
宗臨御勵精文翰與兄度同事秘閣授中書舍人於
時詔勅詔學士以下班書之獨粲兄弟書 上視之
加喜焉度書婉麗粲書飄灑雖出一家而各臻其妙
賜二品金織衣特置象笏以金鏤其名賜之時度爲

學士粲爲侍讀人咸以太小學士稱之 宣帝卽位
告歸展墓盛暑徒步不以騎乘鄉里稱之還朝陞右
庶子再陞大理寺少卿晚乃倦於真書惟喜行草蓋
出入宋仲溫陳文東而得其三昧戶外之履常滿暇
則與客彈棋賦詩一切世務泊如也甫七十遂致仕
歸歸乃盡出所賜金管錫老堂於故址日聚親故燕
飲其中襟度闡爽不屑屑於細故因自號簡菴詩文
興至輒就得意處多膾炙人口

陳 楨

陳楨字景祺華亭人讀書好禮喜怒不形於色洪武

中以薦授禮部主事有能聲嘗大廷議事衆不能決
楨徐進剖析數言而定 上喜甚俾攝部事諭之曰
卿見事明敏四司之事宜悉知之楨益勤飭不敢怠
坐齊麟事謫戍金齒未幾召還授五軍斷事丁家艱
起復上疏乞終制服闋陞主客員外郎出知湖廣襄
陽府時荆土大蝗獨不入楨境永樂初召爲鴻臚少
卿治水東吳陞河南右叅政黃河決勞來有方民不
失業盜發汝寧將窺汴以計離其黨與困其首張子
誠等於均山降者數千兵不血刃而定 上嘉之賜
勅獎秩滿乞祭掃忤 上意謫知交趾丘溫縣時方

暑南中瘴癘甚或勸緩行曰死生命也何瘴癘之虞
至縣一月而卒年五十 上聞而惜之後八年其友
胡士文請於交趾尚書黃公福始克歸其喪槨居恒
曰人惟仰不愧俯不忤而已身之利否何計故歷官
所至並著聲績云

王公亮

王公亮華亭人洪武初以能書舉任吏科給事中陞
應天府治中念草昧之初民心未定乃剗剔煩苛壹
意綏輯以卓異聞遷府丞益自淬礪舉所諳民情吏
治斟酌施行之人大悅服永樂改元調四川右布政

久之復調廣東永樂十二年卒於官體貌魁梧舉止都雅居官廉重得大體國朝京兆丞能拊民者爲稱首云

王鍾

王鍾字公虛華亭人洪武中起家爲掾坐事戍遼東用薦授行太僕寺典簿進燕府紀善上舉義南向鍾侍世子守北京恭愼小心夙夜不懈甚爲世子所重永樂元年陞北京刑部郎中復陞戶部右侍郎鍾爲人端厚沉靜從容詳雅臨事無留滯僚吏多服其能云

李至剛

李至剛號敬齋華亭人少穎敏不羣嘗從學楊廉夫爲詩文有清思洪武戊辰舉明經奉命侍懿文太子初授祠部試郎中旣實授坐累謫戍邊無幾召還爲虞部郎中尋陞河南布政司右叅議會河決汴隄居民危懼建議假王府積木作筏濟之人賴全活甚衆調湖廣布政司左叅議太宗入正大統來朝大臣有言其才且洪武舊人遂以爲通政司右通政方修洪武實錄至剛與焉旦暮在上左右道說洪武中事甚親密是冬陞禮部尚書時禮部之務叢挫至剛

長於剗繁修理井然益見寵遇實錄成有白金文幣
金織衣之賜永樂二年春冊立皇太子命兼左春
坊大學士東宮開經筵與右春坊大學士解縉最先
進講及修永樂大典四方文儒皆集仍以至剛董之
無幾爲侍郎宋禮所間見疏歲餘降儀制郎中然遇
劇務必以屬之與解縉素厚縉旣遭讒出人有言其
怨望者後詔下獄并逮至剛仁廟嗣位念爲舊宮
臣復以爲通政數月又念其老不任朝參改知興化
府時朝廷方需仁澤於天下仰祇德意勞心撫綏郡
民德之甫再歲歿於官享年七十

俞允

俞允字嘉言華亭人也爲人疏節倜儻不羈力耕以事其父父性樂施予一日有道者羽衣策杖而過之因止宿焉父命侍食謂允曰子有奇氣異時當奉大對爲天子命吏遂別去允悟始折節爲儒補傳士弟子是時江南甫定經學失傳獨得三傳於蠹簡中玩味久之欣然有得乃以春秋舉畿內高第至是果舉進士拜楚府紀善改魯山令遷禮部主事奉命使楚還報失期謫長沙判歷前官皆如道人指其後之長沙貶所未至會道病暴卒已而復甦先是病旣革

以易簣待櫬於沙門七日矣忽有醫者貿藥而至或
戲之曰寺有死者可復生否曰可入取青囊一粒納
允口中有頃喀喀數聲竟起不死於是家人大喜競
以金帛酬醫醫無所受詢其姓名亦不答也第云有
長沙白鶴大仙廟盍往修之俄失所在衆皆駭然然
後知其爲白鶴仙神也而或以問允始爲言疇昔事
謂我實神遊其地而未嘗往也往而復還而未嘗生
也其靜定如此及至官訪之果得白鶴廟重建焉居
七年以壽終後孫汝爲復以毛詩舉隆慶辛未進士

守潮州

夏衡

夏衡字以平華亭縣人幼補邑庠生永樂中學士沈
度以善楷書薦授中書舍人內閣書辦累官至太常
卿 太宗北征 宣宗討武定州皆預扈從嘗病醫
云得瓊玉膏可愈語聞 英宗命以賜衡天順初
英宗復位吏部以朝臣名上閱及衡名曰此嘗受朕
賜瓊玉膏者耶衡蒞事內閣最久謙厚縝密未嘗泄
禁中語一時同事者多假內閣勢張皇於外有所干
求衡廉靜寡欲公退閉門獨坐泊如也天順八年卒
年七十有三訃聞遣官諭祭命有司營葬事

陳詢

陳詢字汝同華亭人早失怙事母以孝聞登永樂戊戌進士累官翰林侍讀學士出知安陸州景泰初

召復故官陞大理少卿巡撫北直隸改太常少卿兼學士陞國子祭酒致仕卒年六十六詢性峭直寡言笑平居儼然飲酒能多而不亂在官處僚友和而不同人不敢干以私秉道嫉邪蓋出天授正統中中官王振怙寵公卿皆下之劉忠愍李文毅忤之皆得奇禍詢絕不與通振衡之故有安陸之謫方是時詢直聲動天下人皆爲危之而詢怡然不以爲意也編修

梁誼病語家人曰朋游中惟陳汝同心地好且有家
法孤子女可託也詢聞而諾焉及誼卒爲經紀其家
事無不曲盡至冒謫毀而爲之不惜嫁其女得松人
黃瑜後叅福建政竟以梁之喪歸其鄉其篤於友誼
如此爲文章清勁有氣骨類其爲人主考兩畿判國
子獎拔士類甚衆若嚴銓丘濬楊繼宗彭韶施槃輩
後皆爲名臣

葉宗行

葉宗行華亭人讀書尚氣節永樂中東吳大水松江
尤甚蓋黃浦下流壅塞水無所歸宗行上書請棄其

故道濬范家港引浦水以歸於海示近海民無私作
壩以遏其流 上善其言命從夏尚書原吉治之水
患果息原吉還 朝薦其才擢知錢塘縣錢塘劇邑
民困於徭賦宗行爲定役法俾民自占甲乙書於冊
循次而呼之後遂以均詞訟亦簡不逾年翕然稱治
一日廳事前有蛇蜿蜒若有所訴者宗行諭之曰若
豈有冤乎吾爲汝驗之蛇返入餅肆中爐下發之得
死屍乃肆主人利其財殺之埋此遂伏誅又嘗江行
忽舟重不能進視之一死人挂於舵腰下有石乃里
中人殺而沈之者亦伏誅縣故多虎暴宗行爲文祭

之虎遂歛迹 仁宗在東官聞其治行戒所司不得擅自凌辱按察使周新風采嚴峻尤重之嘗候宗行出潛至其舍視之惟笠澤銀魚乾一封新歎息搆少許而去明日召以食曰此君家物也飲之至醉出三品儀杖導之歸宗行辭不許曰此位可立至奚辭爲時呼爲錢塘一葉清會朝廷大營建宗行率兩浙工匠赴北京道病卒新泣思累日自爲文以祭錢塘人至今稱之謂不愧古循吏云

李伯嶼

子澄清附

李伯嶼字君美上海人宣德丙午鄉薦歷桐廬山陰

訓導秀水安福教諭其誨人一以道義諸生貧而好學者衣食之或不率教雖束修之饋不受桐廬累舉闕人伯嶼至識姚文敏公於少年曰一夔足矣授以春秋未幾夔擢第山陰學或傳風水不利科目請徙之伯嶼曰顧師弟子教學何如耳卒不徙其後仕者相繼陞淮府左長史從王入覲左右請他求伯嶼不可曰君臣之間有賜無求求則瀆瀆則不敬府使人入貢道與一縣令構爭詔下令於獄而釋使者不問伯嶼請治之以戒生事官校有犯王械寘於市伯嶼請論如律以全其生王有疾左右請施僧祈福伯嶼

謂不若貸丁役錢以甦衛士王皆從之成化癸巳卒
年六十八所著有文翰類選一百六十三卷行於世
二子澄清並登進士澄字希范終福建左叅議恬靜
有守不競榮利有古人風清字希憲終湖廣右布政
猶介有志操始終清謹官南京刑部時除母喪謁選
尚書姚夔以其父舊恩欲留之清謝曰荷公盛意知
者謂公自薦不知者謂清有所干也姚歎曰希憲真
君子哉在兵部議儀真守備獨薦都指揮都勝一人
清白請用之推此類可見

夏寅

夏寅字正夫華亭人正統十三年進士初爲南京吏部主事歷郎中杜門誦經史百家言久之發爲文章淵宏奧密脫去流俗自成機杼陞江西按察副使提學專崇行實黜浮華閱卷一目數行下善於鑒別無有爽其衡者復文山祠葺白鹿書院修陶侃讀書臺陞浙江叅政處州民苦虐政走山谷招不聽曰須夏叅政來寅檄至卽散成化二十二年進山東右布政使敬簡有容愛民節用或勸興作不聽曰勞而不怨斯可疏論國家之勢在離合合則安離則土崩今兩京並建其勢宜常合以制天下徐州地連山東饑饉

無聊宜在賑恤臨清南北咽喉一或阻梗爲害不小
宜選大臣有望實者鎮守二邦訓兵屯田示天下形
勢廷議爲出白金四萬兩賑徐州命都御史賈俊鎮
臨清吳中旱饑有司莫以告寅投書巡撫發廩二十
萬石糴米十萬石賑之他所論列若文廟禮樂之數
正風俗立紀綱崇文化作人材之類皆切於政本誠
心直道無黨無援自筮仕爲郎二十年爲副使十六
年未嘗以淹屈降志嘗曰君子有三惜此生不學一
可惜此日閒過二可惜此身一敗三可惜

錢 溥

錢溥字原博華亭人正統己未擢進士試薔薇露詩
稱 旨命教內書館授翰林檢討擢春坊左贊善仍
兼檢討修寰宇通志成陞左諭德兼編修天順丁丑
改尚寶司少卿陞侍讀學士賜二品服充東宮講讀
官壬午奉使安南國賜一品服甲申坐內侍王倫事
出知廣東順德縣成化丙戌復故官閒住癸巳起掌
南京翰林院事秩滿赴京擢南京吏部左侍郎己亥
入賀 聖節尋乞歸命以本部尚書致仕補一子爲
國子生丁未進階榮祿大夫再補一子國子生弘治
戊申五月卒年八十一賜謚文通溥少有文名旣擢

第聲譽勃起嘗上書楊文貞公論學文貞遽之居父
憂與巡撫周文襄公論便民條約復移書侍郎李公
論積荒召佃煎鹽水次倉四事多見施行在順德釋
繫囚撫流民尤多善政 英宗復位大臣多受賞溥
言於兵部尚書陳汝言曰當時非 皇太后手詔則
曹石二人焉敢提兵入禁宜以功歸諸 太后上尊
號爲宜汝言入言之 上卽舉行已而問知出於溥
也故有學士之命使安南與禮部論移文不當與內
臣同行禮又與內臣書論 詔勅開讀先後之序至
安南與王論郊迎禮儀王辭屈悉從之瀕行贐以金

不受至遣陪臣入奏乃以上命受之時以爲得體
前後五典文衡門生滿天下文章瞻蔚至老猶不衰
四方求請者相屬名山靈境鐫刻殆遍尤善交際見
者無貴賤皆得其歡心故人尤傾慕之

張 審

張審字廷器華亭縣人正統戊辰進士景泰元年擢
監察御史北虜內寇承勅往北畿河南山東清理
馬政審雲譌言有不軌者受審命往察且撫定之出
按宣府大同有都御史子犯法乃按其罪并劾其父
罷之以宣府將佐多冗請分守獨石諸邊歸總諸道

承勅巡臨清按治豪猾餘黨悉散天順三年陞江西副使風裁肅清吏不敢欺七年陞江西按察使寡默博洽居官務安靜輿論或謂其無爲然事賴曲成者實多贛州賊亂以捕獲功賜金幣成化二年陞陝西左布政隨陞右副都御史巡撫寧夏城皆土築始甃以甌導河流以溉屯田若干頃修衛學給廩食嘗帥兵行邊與賊遇斬獲男婦及牛羊噐械賜勅褒諭陝西固原達官滿四叛會王師出征劾官將致變者寘之法時寧夏所屬地方多永樂所置降虜朝廷慮其爲變受密勅撫之各安其業七年丁憂

十年起原職巡撫保定等府值久旱給民牛種俾不廢業復承勅勾稽戎籍王師出宣府督軍餉不乏十一年改大同斬首虜奪兵械築城浚濠清理屯種復被勅褒諭十三年召爲刑部右侍郎十七年轉左江西有大獄連引千餘人命往勘皆得實十九年陞刑部尚書用刑多主平反囚無酷死者二十二年加太子少保尋丁憂服闋孝宗御極起南京兵部尚書叅贊機務秩如故以國家根本重地政尚簡靜兵民悅服蓋自筮仕以來歷三朝四十有六年更十命年七十有一而卒其始所樹立施措舉克自

遂而終厚重持之長髯偉幹襟量夷坦與人謙讓不
事矯飭不以富貴加人人以是稱之六年卒於官壽
七十一贈太子太保謚莊懿

任勉

任勉字近思松江人幼岐嶷厲志篤學登正統甲戌
進士授鄱陽令滿九載陞知瀘州會鄱民詣闕請留
移守饒州府以前守在政同知府事薦爲福建右叅
政尋改都督府經歷考察南直隸官吏出知徽州府
以事謫滄州者八年復以薦起知蔚州丁母憂服除
知睢州年七十上疏致仕壽八十有九而卒初勉宰

鄱陽思前令所以亟黜率因襲苟且拂民情而壅上德法所以逮也訪邑有德學爲民所信鄉者爲四門老有事相與酌輕重而處之有不便者或粘匿名文於縣門勉曰是教我也俾勿壞婦有新寡者訴兄夫弗育已勉曰汝欲他適乎乃判其背衫曰餓死事極小失節事極大後婦終守節他發聞之亦無二志文廟丁祭羊豕往悉科於民勉曰是豈崇報意哉歲令里社分畜而獻之饒著爲令暇則坐學宮與多士講解授受如嚴師鄰邑樂平傷屍誣逮郡以檄勉微服往偵得其情兇者款服枉者得釋先後爲令者皆不

及也

衛 穎

衛穎字源正華亭人祖諱炳當元季以鄉兵歸高
皇帝從征伐授薊州衛百戶累功爲濟南衛指揮使
世襲穎以正統己未上京師太保成國朱公奇其貌
選領山東漕兵又改領京營番上兵甲子朱公又試
其騎射謀略薦之朝擢山東都司署都司指揮僉事
己巳之變應詔入衛尚書于公謙以穎名薦實授僉
事進都指揮同知時廷臣有異議者請募死亾調諸
藩兵以壯根本是冬虜酋也先入寇帥兵邀擊於黃

花鎮白羊口又分守西直門連戰累日又承勅副石
亨總京營諸兵以功實授僉事虜旣退進都督同知
賜蟒衣玉帶又與都御史俞士悅稽兵籍收散卒造
器械景泰壬申師兵出駐宣府癸酉召還復督諸營
兵天順丁丑 英宗復辟進左都督掌前軍都督府
事兼領禁衛日給酒饌賜寶刀白粲諸物與兵部會
閱禁兵冬錄迎鑾功封宣城伯食祿千一百石賜誥
券戊寅佩平羌將軍印鎮守甘肅適西虜大至議者
謂不宜輕動頴奮曰不奪賊氣城何能守鼓行而前
連十二戰破走之會廷臣議封爵有所釐正 上以

穎方膺邊寄特仍其舊辛巳又破諸番於涼州都督
毛忠在虜圍冒矢石往救全帥而返甲申西寧番把
沙作亂師衆深入擒斬俘獲共千七百餘人馬牛器
械甚衆又請立儒學建廟置田教人醫藥皆舊所未
有者西人至今德之不衰 憲宗卽祚召還成化乙
酉命掌左府事調前府丙戌錄河西功加歲錄百石
賜世襲伯爵佩征虜前將軍印鎮遼東女直毛憐犯
塞據險設伏追還所掠若干 上降勅獎諭巳丑以
疾請召還京第壬辰命視後府事尋命守備鳳陽丁
酉調掌南京後府事協練京營兵兼督習水戰連上

疏請老辛丑復召還奉朝請後十有七年卒於正寢
壽八十八贈宣城侯謚壯勇穎廣穎豐頰聲欬如洪
鐘言論英發意氣直遂而沈實有謀折節下物曲遵
矩度老益更事歛不世用雖達官貴人不復延接坐
饗富貴以終天年然深居燕坐聞四方警報則抵掌
扼腕居然有馬伏波之志蓋其性然也

唐 瑜

唐瑜字廷美其先晉陽人宋御史中丞子方之後高
祖英洪武初官上海烏泥經稅局因占籍上海登景
泰辛丑進士授南京禮科給事中蹇蹇不阿選知浙

江衢州府九年擢湖廣右叅政遷山西右布政使未
行丁外艱服闋改雲南未幾擢都察院右副都御史
巡撫甘肅瑜之守衢也詢民間利病以次行罷衢人
大悅會歲久旱且疫瑜還自朝覲下車卽宿城隍
廟自爲文以禱三日雷雨大作後凡值旱禱輒應吏
民相與勒石於周宣靈王廟舊有孔子祭田奪於民
瑜以俸贖還之俾世供祀事有假媒聘賺財旣而懼
瑜之威驚二子及妻以償瑜曰民窮而犯法畏法而
棄妻子守之過也贖其妻還之衢民健訟瑜決斷如
流數辯疑獄民遂不敢欺及去衢衢爲立生祠祀焉

其在湖廣城京山襄河爲害作隄障之置廣儲倉歲
饑發賑民賴以不徙其在雲南定土官世襲法以絕
爭訟定滇糧給散之宜甘肅兵政久弛至則陳時政
四罷叅將田廣副將許寧李嶼勞邊軍恤陣亡邊人
竦然會中貴人以事諷瑜不從廣等從而媒孽之竟
坐事去弘治五年詔復故官致仕七年卒於家春秋
七十有二

侯 蓋

侯蓋字進忠華亭人少游郡學廬陵孫先生時爲教
授命作無極太極論文成理致粲然甚見稱許正統

辛酉中應天府鄉試屢試禮部不中景泰中從吏部
選尚書泰和王公見其文歎曰子何乃不得第進士
耶擢寘第一授襄陽府同知比至以屬吏不知爲政
取前元張文忠公三事刻木傳之痛抑豪民爲襄王
所知厚加禮待三年俄丁父憂服除改處州州號難
治屬邑龍泉慶元居民盜鑿銀鑛恃險爲亂鎮守中
貴人欲請於朝盡勦絕之蓋言此州民常態願往諭
之用其言民皆散去竟無事秩滿乃擢都轉鹽運使
司同知鹽池無垣諸無賴相率持兵械入池恣取往
往爭奪殺傷有司莫能禁上疏陳其弊 朝廷命御

史一人巡視人乃知懼仍用其說築垣以闌人蹟垣廣袤百二十餘里外鑿濠濠外復築堰以防水患周垣建舖舍二十四以居邏卒復創分司二於池之東西功畢而鹽弊頓革先時池旁居民每藏私鹽窖中以牟大利蓋諭以利害民爭自首悉歸所藏於官自是鹽法大通商賈益至邊徼多儲蓄歲省轉輸之勞又歲嘗大雨池水泛溢鹽無所出盡率寮屬致齋七日禱於池神明日天霽而其旁數里雨如故人以為誠感居官二十餘年盡心職業未嘗有過年未六十即自引退

朱奎

朱奎字文徵號鶴坡華亭人年十二以奇童奉詔入內館讀書師翰林諸公授春秋經而褒貶大旨皆明於胷中甫弱冠進游國學景泰紀元庚午拜中書舍人天順癸未轉尚書司丞成化丁亥進秩正卿然眷遇日隆而忌者益陰擠之遂兩外調爲廣東副提舉爲保寧府同知奎殊不芥蒂於懷但竭心民事盡其分所當爲而已用是政聲燁然聞於京師 憲宗思爲近侍舊勞召還復官仍直文華殿恩寵視昔有加焉壬寅擢太僕寺卿三載奏績進大理寺卿給從二

品祿明年丁未以衰邁謝事留居京邸奎平生孝友篤至家庭內外咸得其意器度軒昂心性倜儻飄然出塵每遇賓朋過從輒觴詠或手談終日不倦自少壯至老未始有異所著詩文成巨帙藏於家而詞藻清俊殆類其爲人也

談倫

談倫字本彝上海人長身豐頤瑩然玉立景泰丁丑登進士觀政吏部時鹽山王忠肅爲冢宰風岸孤峭意輕南士見倫瞿然曰南方有此人耶因授驗封主事甫一年擢員外又擢郎中性開朗又善于銓事忠

肅愛之 英廟每召見忠肅輒以倫隨 上問之忠
肅以名對曰臣老矣於 聖諭恐有遺忘此郎代臣
志之且其人可信也 上因欲大用之忠肅謂年少
資淺他日用之未晚久之丁母憂服闋至京則濟南
尹公爲冢宰補虞衡司三載擢應天府丞鳳陽大水
尹京者不敢以聞倫自署其奏是歲詔免秋糧數萬
進尹應天改順天會軍興橫索民車以千數許以百
兩不可倍之不可再倍之又不可乃具以聞詔以百
兩與之自是軍士無敢橫進工部右侍郎筦易州新
政搜逋挾隱剗削奸蠹歲得羨餘若干萬會南昌人

李孜省以左道倖尹公子龍被逮尹公以是去倫亦隨之初公受知忠肅忠肅之病也日侍湯藥於左右忠肅臨終以託崔尹兩亞卿兩亞卿亦自才之故往來三家如家人父子時萬文康在內閣有憾於尹因孜省媒蘖醞釀以成其獄士出尹公門及山東者盡逐之朝班爲空尹公之門無敢闖焉倫於尹最厚其行也又往餞之故及成化初公道昭宣孜省伏誅謫逐者多召還而倫竟以病不起年七十五初倫家居歲遣人起居尹公於山東忠肅之卒也視之別室崔公歿亦如之尹公亦如之其篤於所事如此

張悅

張悅字時敏華亭縣人天順庚辰進士自少凝靜持重篤學力行已爲鄉里所推重初授刑部主事歷員外郎奉職守法以不欺爲本朝士有囑其所親者曰不敢撓公法但乞假一詞使知某嘗有言耳事訖而問之曰其人無大罪旣據法施之矣敢僞言以市恩聞者歎服未幾陞江西僉事持大體不事苛察尋改浙江提學始以糊名校士尋去之曰我且自疑人誰信我請託覬覦屹不爲動而士皆帖服無敢干以私者所獎拔往往取魁甲爲聞人衆神其明而莫測其

所爲用成化十四年陞四川副使十五年進湖廣按察使甲辰入覲時中官尚銘在東廠任事衆羣趨其門悅獨不往銘銜之伺察無所得未幾銘敗而其名益彰二十二年進都察院右僉都御史二十三年陞工部右侍郎弘治元年遷禮部二年再遷吏部右侍郎五年轉左侍悅臨事卓有定見癸丑大早上陳遵舊章恤小民崇儉素裁冗食禁濫罰數條并修德圖治二䟽皆嘉納之時吏部尚書王恕負時望尤倚信於悅凡有言無弗從嘗兩攝選議翕然稱允六年陞南京右都御史振厲風紀臺中肅然八年陞南京吏

部尚書鎮定簡靜上下安之雖中官亦加敬禮守備
太監陳祖嘗設席獨延上坐弟姪問更召何人曰他
人豈可同此席其爲時所重如此九年改南京兵部
尚書叅贊機務凝重不撓留都倚以爲重議事每持
大體爲根本遠圖不操切文具十二年加太子少保
致仕卒贈太子太保謚莊簡悅平居謹畏小心無疾
言厲色至臨事卓有定見未嘗以恩怨利害動其心
或言有善讀書不善作官者笑曰此正不善讀書耳
世豈有遵書本行而誤者性素清約自小官至重任
終始一節爲縉紳表率者四十餘年及歸處舊居杜

門不出在外公私事一無所預時見風俗奢靡益崇節儉以率子孫至於待賓常費亦不敢少豐以勸薄俗故自筮仕至宦成無貶議云

王 霽

王霽字景明上海人天順四年進士拜南京刑部主事歷郎中累辯疑獄有能聲遷黃州知府府嘗有虎害火災又江水常暴至壞民廬舍霽祈祝有應以是民愛信之遷廣西叅政未幾遷江西按察使進太僕寺卿時馬政廢弛霽條陳十事奏行之宿弊爲之一革用薦遂遷僉都御史巡撫山東值歲饑民多死徙

霽爲區畫銀五千餘兩米二百餘萬石賑之存活者甚衆召拜大理司卿稱用法平易至是卒賜祭葬如例霽務爲和厚所與交無不得其歡心雖輿隸輩亦鮮有怨之者故歷官中外三十餘年所至皆以得美譽焉

唐 珣

唐珣字廷貴華亭人天順丁丑進士知合州興學勸農盜賊解散民立生祠奉之以刑部郎中知福州府時歲亢暘至之日霖雨滂沛人皆相賀或言故事當先謁藩府珣曰未成婦而先見姑嫜可乎竟先之任

識者以爲得體中官汪直用事聲勢振天下有假其名號行事者所至官吏望塵屈膝珣獨察其僞將執之衆交諫不聽訊之果姦人也由是風聞四方姦黨奪氣豪僧殺人有爲之地者獄久不決珣一訊寘於法時皆快之設義塚以收無主之骸嚴焚屍之禁開仁惠里洲以廣民業築五虎門塘以禦海患閩人歌之歷湖廣叅政布政使入爲順天府尹先是吳玘以彊直罷衆謂宜少貶以避禍珣至守法如故衆亦無以怨也遷右副都御史巡撫薊州等處以母喪歸服闋會南蠻弗靖卽家拜右副都御史巡撫兩廣方疾

聞命卽行卽至督兵進勦破材寨崑洞百餘斬獲萬計捷聞賜勅獎勞將大用未幾以疾卒

陳章

陳章字一夔華亭人少貧力學天順壬午舉於鄉會父喪家居教授不出者十年御史天臺陳選聞其名特就訪焉已而入太學爲司業耿公所器成化戊戌第進士拜刑部主事或問公老儒也此何以處則誦周元公之言以對曰殺人以媚人吾不爲也將終身行之進員外郎郎中天津有冤獄逮繫百人詞連及大臣久不決章一往得其主者寘之法而餘皆獲釋

尚書何喬新九重之凡獄有疑滯稱寃於理寺擊登聞鼓者必於章決之有不合者必反覆辨析當於理而後已有御史按陝西以疾惡忤貴近繫獄章鞠曰御史非私也卽罪不至於死貴近愬於上廷鞠之議者觀望不敢決章抗言於衆曰朝廷清明茲事不宜手滑今天顏咫尺可否在一言而連日齟齬公耶私耶衆知不可奪卒從其議遷湖廣按察副使未行坐原從卒犯法以舊官調瑞州府同知盡心歷事人不知其爲謫者陞知高州府時方征雲壚大桂賊章爲檄招之降者十餘種任事者欲以章力爭得止

或遂請兵可轍又爭止之乃設賞格遣人四出招捕有降者勞賜而遣之賊遂解散移黃州府會御史來勘事彊檄諸雷州病瘴卒章爲人端重言動有則喜爲詩與李西涯謝方石諸老相倡和出不以罪又投荒以歿時論惜之

張誥

張誥字汝欽華亭人成化丙戌進士改翰林院庶吉士授監察御史出按湖廣有能聲陞廣東副使改四川尋陞按察使弘治初歲饑誥請截荆襄衛兌運又發庫銀易米得數十餘萬石隨在賑貸所全活頗多

陞貴州左布政未幾陞右副都御史巡撫雲南平疑獄諭亂夷得撫綏體本邦益密二部連兵不解誥檄諸道練兵爲必討計皆懼而自戢朝廷嘉誥之功而厚賞焉弘治戊午乞歸至是卒誥有才翰然頗事嚴厲其在雲南時以措置失宜幾及於禍幸而免

曹時中

曹時中華亭人初名節惡其類於漢常侍也遂以字行舉成化己丑進士歷官浙江按察司僉事以家難歸廬墓三年所居山麓產有瑞芝時人皆以爲孝感服除復補浙江累官副使與當事者議相左卽拂衣

歸年甫六十人詰其故答曰吾有采蓴舟不能忘爾
抵家閉戶掃軌甘貧自守隣有悍生怒其魁岸以墜
書時中名於牛後向其僮而肆詈欲以激之也僮歸
以告徐曰是人詈我而若述之是重詈我也速往謝
彼無勞君齒頰吾僕也不敢傳言生不能難然必欲
逞志乃已每日將晡則幅巾倚杖獨立門屏生於是
修尺一若爲候者而中則痛詆極毀伺其出時令人
直入蹠上之曰若休矣侯吾僮來旣而從者至命取
火燔之曰知若主於我無慰好言也老年人不能答
聊自解耳生媿而止貴公子某者挾妓遊天馬山鼓

吹而過其門使人召而榜以檣楚教之曰若父居官躬素絲之節而若敢淫肆如是吾於若大父行也不戒若是不子若也今吾且代若嚴君爲治貴公子自是不敢復出折節爲恭矣初以定名菴旣又愛唐人青山宜晚眺之句而富林爲九山窟則別號曰宜晚居士春秋旣高守道彌篤大司空見素林公舉以自代不報年八十時作壽藏於玉屏之丘每日殮罷往塋片時曰此中無朝無暮無春無秋恍似天地之初我復於初無不適矣壽九十餘無疾而終終時有紫雲自天而降繞戶良久人以爲仙去兄名泰舉景泰

甲戌進士性甚惇實有僕竊其金爲平康之遊則索
枵然矣時怒甚往訟於比部郎郎追妓至痛榜之妓
怨反誣泰以不潔語坐是罷不敘 英廟復位有白
其寃者而名偶同 景皇帝年號又景皇帝時所舉
士也遂不果用居數月朝會得匿名書下部考驗憾
泰者誣焉 上聞曰必若人也恨我廢斥耳詔逮至
京緹綺疾馳入郡時守某泰同年也素高其誼竭貲
賂焉已同使者抵泰門請先入入則泣而語之故曰
予亡若何吾爲任罪曰君命也何所逃罪檻車請司
隸拷訊備至不勝慘毒遂自引獄至冬朝讞有擊登

聞而號者曰校書人在也日者小人有母今亡矣吾爲吾母而負吾君今又以負他人吾何面目立於天地耶請就法訊之則故中書某耳泰乃得釋而肢體已廢復歸富林以詞翰自老時人語曰富林二曹一時人豪

高祐

高祐字天錫上海人本王氏父鉉贅於高因從其姓成化丙午以鄉貢士授泉州同知泉多山路民倚險爲梗祐訓以德義首惡皆從化積歲逋欠不督而集凶年貸民粟以山鄉遠召從化者總授而分給之遠

邇稱便每出山民扶老携幼送迎者屬路嘗道漳州宿山間有負豪家債而憤其逼者聚千人期旦日殺豪豪亦號召爲敵祐知之俾館人往諭以禍福片言而散其感人有如此者一日令所部市茶其人密置銀二錠以進祐啟之笑曰爾謂我有求耶却還之屏其人復弗接丁外艱歸部民送者千數爭携金錢跪贐皆不受至泣而還歷廣平東昌二府操履如一晚居邑西一室蕭然晏如也時鄉人議士大夫有三婦之喻獨目祐爲節婦云

張 黼

張黼上海人成化丁未進士授南京刑部主事進員外郎中精於法律雖老吏無以過之而不肯爲苛比以附致人於深罪有里嫗訟其子不孝者引其子責曰是非汝所由生耶語其母曰是非汝所生耶胡爲乃爾反覆開譬以人倫之義皆感悔泣去久之子鳳鳴以御史官南臺旦暮定省樂也一日出郊鳴鳳自郊歸值之下馬立道周他御史疾馳去乃歎曰吾老矣安得復與兒子輩爭衡哉卽日疏乞致仕上嘉其恬退進應天府丞以歸性澹泊敦謹不事表襮下至臧獲亦得其懽心然人有過則面折之人知其非

苟然者其幼也嘗夢神示以府丞字莫測及致仕而有應天府丞之命得喪固有冥定者耶

張弼

張弼字汝弼號東海華亭人登成化進士以言事忤宰相去尋拜兵部主事轉員外郎陞南安府知府府當兩廣要衝大山長谷亾命嘯聚爲患日衆弼下車悉捕威之尋罷諸役以節民勞修橋梁道路毀淫祠百數十區建特祠以祀張九齡李剛劉元城諸公至周程三先生旣祠而又立吟風弄月臺以致景仰其振勵風化類如此後謝病歸民立生祠祀焉歸三年

卒壽六十三弼資稟靈異充以學問老且不倦詩文成一家言草書之妙冠冕一代所著有鶴城東海諸藁若干卷世謂文人類多浮薄弼獨惇尚行履慨然以風槩自持雖議論間雜諧謔而往往必以理勝故爲一時所歛服云

奚 昊

奚昊字時亨華亭人質貌頽異九歲就外傳藁白金爲學資有婦人道哭問之曰家貧鬻絲得百錢而遺之舅姑老無用爲餽粥具卽以所持金子之歸以告其父父曰兒能如是吾無憂矣弱冠父疾刺血籲天

求以身代又重傷母太安人心匿不使聞舉成化戊子鄉薦連捷己丑進士第循例歸省壬辰拜刑部主事明敏精吏法片言擿伏人服其能遷員外郎勘貴州獄歸奏稱旨進郎中庚子復乞歸省遂就養焉居數月會瑞獄作事尤劇昊受命往日奔走勞瘁成疾以卒年三十六昊和厚易直重恩義幼學時母析貲予之悉以讓兄冕俸所得金帛必分族屬爲員外時同年董知縣失官道遇寇貧甚爲館穀給綈纊厚贖之還使經景州有故寮劉判官死五年不能舉昊葬之且卹其家平居恭遜見里中先輩無窮達皆不

敢慢處寮案終日不色忤故人多愛樂之尤嗜問學
寒暑不時輟喜臨晉唐書爲詩文往往有奇思與客
賦詠值意得恒夜分不寢有稿若干卷藏於家

周佩

周佩字鳴玉別號北野松江人天性穎悟力貧好學
入郡黌聲譽焯起一時多從遊之士成化癸卯登鄉
薦弘治庚戌進士授工部都水司主事陞員外郎職
征商稅督理工作出納財賦浩大往多以貪墨敗佩
獨毫髮不污弘治庚申以母老乞歸侍養六年母卒
服闋轉刑部河南司郎中理獄明慎時逆瑾擅政權

勢烜赫奔趨於其門者多驟致通顯佩獨不往瑾每問人曰刑部周秀才吾不識之何如人也懼及禍亟疏休致以歸養高林泉詩書自娛 世宗卽位舉優老之典進階中憲大夫福履優游歷二十五年乃卒天性孝友色養誠篤竭力賑卹族人生平寡嗜好居室之內一榻蕭然倦於將迎有司延鄉賓多辭疾不赴獨好學雖老弗倦晚益喜讀易觀象玩占多所妙契作文典雅詩學唐體書倣晉帖皆有法仕旣不大顯家居生理尠薄至無以自給當道謂廉貧高尚宜蒙恤典於是有司歲給優養前郡守善化熊侯雅致

敬慕嘗袖白金十兩遺之卒而歛且葬也實籍此

袁愷

袁愷字舜舉其先安丘人占籍華亭愷少貧獨學時
出事賈販不爲人知年二十七始棄去勵志讀書入
府學爲弟子員未幾擢進士授刑部主事推摠三法
司事陞江西按察僉事改廣東所至有聲人始奇之
江西賊圍西貴縣長洲村愷率兵往捕時賊勢方熾
或請宜少退愷下馬令曰吾在此汝何敢不力叱使
進攻克之巡撫葉文莊知其才委調狼山兵懾不敢
肆又率偏師駐全州督軍餉贊畫梧州總府多所裨

益都御史韓雍征大藤峽愷躬擐甲冒矢石以從
時皆壯之賊平錄功有寶鈔文綺之賜擢廣東按察
使進右布政使遷雲南左布政使未至卒愷居官廉
慎不爲身謀出仕三十年家無餘積卒之日橐中蕭
然在鄉里任真履素不以勢位自居出入乘便舟從
一二蒼頭見者不知其貴人也時以此高之子珮孫
讚皆以能書授中書舍人直文華殿

孫衍

孫衍字世延華亭人自幼穎異弱冠領鄉薦尋登成
化戊戌進士知深州閱數月丁艱歸服除補信陽州

沔陽魚稻之鄉商賈軍衛強貪巧取明左券定市價
民始得享其利而於勸農興學扶弱抑強尤加之意
陞南京兵部員外郎中中官假進貢索馬快船無虛
日每裁抑之因而構成大獄上命法司按治之而
中官之勢少殺奉部檄稽覈馬政釐革宿弊最多丙
辰陞延平知府邑屬有盜殺人劫財匿山谷間而其
家誣以良民余新抵罪訊知其寃果得真盜而余新
之獄立出邑有羅太學恃富武斷華人至死收捕之
一郡稱快異時解京料價多爲勢家包攬負累重徵
令編戶自輸歲辦完民亦無擾歲徭役皆手筆親定

推見纖悉人服其均民婚嫁往往以論財後時尤喜
焚屍皆嚴加禁止復設義塚以處貧乏修郡志以備
往蹟未幾卒於官年五十有九

唐 禎

唐禎字元善號西園華亭人生而穎敏性復淳厚鄉
先生見者皆器之家故饒財而能自刻勵讀書百里
外止以一僕自隨清苦如寒士不數年而學成以金
山衛學生領成化癸卯鄉薦丁未擢進士衛學登進
士自禎始弘治初修 憲宗實錄分遣進士詣四方
采撫時事以禎往浙江悉心搜訪其所纂輯視他省

獨精詳諸公稱之疾謁告歸承顏視膳雍容於二親膝下者踰三年而母卒服既終有勸之仕者辭曰吾父老懼養之弗及也居歲餘強遣之入都始授車駕主事明年以父喪歸辛酉改禮部儀制司主事乙酉陞員外郎中遲徊前却在官者僅八寒暑凡爲二親故也爲人坦易色笑可親而中有矩度發皆中理浙江鎮守中貴人例自尊大禎往報謁見中門閉取刺授閤者卽上馬去時謂其得體儀曹重事在貢舉禎兩司提調視範周密過於往時哈密貢數倍常而物皆濫惡禎在主客曰是虛名而靡我寔賜也且以折

估聞使者來愬譁於庭不去使譯諭之曰爾欺爾王
易爾貢以爲利不爾罪足矣而又敢譁耶不聽且移
文邊關詰爾王爾罪安歸使者情得乃屈服精膳王
事凡以新茶至者必先呈樣樣者其名寔則以爲私
餽從來久矣禎至飭門者正供外無得入其風槩清
肅如此家居事伯兄愛而能敬雖異室而處家事悉
聽其處裁終始無間從兄子早孤卽養於家爲娶妻
殖產後卒復拊其子宗婣族黨有貧乏者必周之雖
數無倦色丁未待試時主人女見其獨處窺牖與之
言顧見卽趨出徙他舍僕陽宗者嘗荷篋墮水污壞

其禮衣衆謂必得罪聞而怡然曰人無傷足矣衣可更製也卒不問亦可謂厚于待物而嚴于守身矣

顧清

顧清字士濂華亭縣人生而穎異九歲受小學過目成誦繼受詩於怡菴任先生一見奇之字以甥女年十五謁張莊簡張以元老負重望卽具冠服出見退語人曰大器也弱冠遊縣庠與錢太史福沈惟馨悅交最厚奮志於學廣閱羣籍而業日進三人者藝皆頡頏而清獨以沈實識者占其遠到尤爲督學司馬璽所器重每期以公輔家本儒素值歲稔有常情所

不堪者而清安貧固守自若嘗書座右曰毋徇物而
爲所溺毋狎物而爲所乘弘治壬子王文恪王南畿
試事閱清文曰昔歐陽子謂當讓蘇子瞻一頭地斯
人也我當讓矣遂置第一明年癸丑會試第二名廷
試吳文肅爲掌卷官或欲道之往見清辭曰昔人所
謂呈身者吾愧之竟不往洎吳得清卷極力贊美以
九重字失提寘二甲第一改翰林庶吉士讀書中秘
每試必在甲乙清與同年毛澄羅欽順汪俊每以名
節共相砥礪十月授編修預修大明會典癸亥正月
丁內艱三月以會典成進侍讀正德初還朝與修

孝廟實錄中官蔣琮誣逐臺諫涉歷既久章䟽雜沓
時逆方熾僉畏觸其黨莫敢涉筆清潛披精核盡載
其實有嫌而欲節畧者清不爲動丁卯主南畿鄉試
尋充經筵講官前後進講義辭旨剴直多所裨益逆
瑾竊柄朝士多屈意與交清抗不爲禮鄉人張文冕
用事附和者皆至美官清絕不與通有言清肯枉一
刺卽高位可致清叱曰吾足可輕動乎吾但知做吾
官而已遑知其他戊辰十月丁外艱己巳五月實錄
成例當進秩瑾啣之矯詔降編修尋調南京兵部車
駕司員外會憂不赴庚午瑾誅還侍讀辛未陞侍讀

學士兼修玉牒甲戌主武舉考試乙亥掌院 詔同
內閣照例考察九月有文綺之賜十一年秩滿進陞
詹事府少詹兼翰林院學士充經筵日講官丁丑主
考會試防範嚴肅崇雅黜浮得士爲盛奉 命教庶
吉士一時出門下者咸一代名流又嘗教內書堂不
結生徒不使與子弟相接常曰此輩如穢物遠之猶
恐其汚况近之耶餘姚謝文正每稱其臨事有守以
此時 儲位尚虛清䟽請預定不報 武宗數巡幸
屢䟽甚切是歲陞禮部右侍郎與毛文簡協心秉正
會 郊祀且迫而駕猶未還清草䟽數百言上之

上亦爲感動秩滿進階贈及再世廕一孫入監讀書
辛巳 武宗崩 世廟繼統會議迎 駕冊立頒詔
易服臨喪諸吉凶大禮清援古證今折中羣言時以
清所議會得體有忌清欲傾之者嗾臺諫撫他人事
誣清不根特甚衆論囂然內閣亦持之不下而清從
容鎮靜因詔例自引退無少濡滯一時皆爲清不平
王文恪方家居因作風聞論以雪之論一出而輿論
益定於是南北臺諫上章論薦 上乃起清南京禮
部右侍郎清旣歸絕意仕進不謂復有 簡命不得
已之任兩疏乞歸不允疏益懇是秋得諭旨陞南京

禮部尚書致仕先是清以進 徽號賀表上京至東
昌聞命有勸清謀以代進者清曰清被 皇上渥恩
得遂私請今一事不終豈人臣之義乎時已力疾猶
云縱不能覲 天顏得一拜闕門爲幸抵德州輿疾
而進卒於河間府瀛海驛壽六十有九清疾革時知
府牛天麟問以家事曰無以問也吾表安在謹護之
牛深歎其忠勤始終敬畏不亂

錢 福

錢福字與謙號鶴灘華亭人成化丙午舉南畿鄉貢
已以文著禮部下第卒業國學屢試皆前多士名益

起以弘治庚戌禮部第一每爲文字不屬草廷試三千餘言辭理精確若宿構然者彌封官以無藁難之衆謂科場必欲具藁者防代作也今殿陛間萬目所視何嫌之避閣劉文穆公得之嘖嘖不容口曰程式中乃有此等文字邪以請於上復賜第一福幼時病甚劇其父夢人語曰爾子吳寬也時吳文定公尚家食后連舉省殿二元至是乃應松人在國朝未有爲狀元者有之自福始授翰林院修撰癸丑同考會試以疾乞歸就醫藥居數年以例得致仕放意山水益肆力爲文藻出入微纏維志所適遠近購請廷

扣嚮答殆無虛日每廣坐間羣客競請各用幅紙爲起居酬酢交錯不廢諧謔以其隙遞續之比酒罷無弗就者因相與賞歎之以爲稍自靳惜擇言而省度其所請當不止此而恃才任達不遑後恤久之以酒成癖遂不起年四十有四而已有才如此而弗克究其所欲爲惜哉與謙家居能色養念父老欲具疏乞移近地例不得行教其弟以有成亦領鄉舉與人坦率不立町畛有犯者笑而受之不爲報故雖以才見忌而怨怒不及云

陸深

陸深字子淵上海人發解南畿舉進士入翰林是時弘治御極朝廷清明百官安其職得以其餘肆力於簡冊翰墨之間諸司各屬往往名雋繼起與館閣之士爭衡深於時翹然特出與李空同徐廸功上下其議論至於字學比於趙松雪深臨書日數百字過同舍見髹几輒縱筆塗寫旁若無人其品騭古今商確事理賞析文義辨識書畫古品談鋒灑然一座盡傾天下之士聞其名而慕往揖其貌聽其論而驚以伏也深自翰林編修陞國子司業丁憂家居數年以廷臣薦起入備講讀遂陞祭酒一日經筵進講內閣閱

其講章輒加竄易深講畢面奏云今日講章非臣原
撰乞自今容講臣得盡其愚 上雖可之而經筵面
奏非故事深出上䟽謝罪 上復批答以講章內閣
閱看係舊規不必更改若有所見當別具聞深感激
條奏有關聖學事凡千餘言上之當路益忌之䟽下
吏部左遷延平府同知陞山西副使提學陽曲生員
父爲知縣笞死訴於御史趙反抵生罪深與力辯不
合卽上䟽劾趙趙亦劾深已而科道官勘實趙謫外
任深得復職補浙江副使仍理學政陞江西叅政四
川左布政召爲光祿卿內閣䟽薦領修玉牒改太常

卿兼侍讀學士扈 駕幸承天給行在印陞詹事府
詹事宗廟災 詔百官修省於是深䟽乞休得致仕
後數年卒遺文凡一百卷又著詩微書輯道南三書
河汾燕間錄史通會要蜀都襍抄平胡錄諸種博而
核皆足傳世

本朝分爲人物考卷之二十五